



Sud Bosne i Hercegovine
Суд Босне и Херцеговине

Broj: S1 3 Iž 038290 20 Iž
Sarajevo, 29.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović kao predsjednika vijeća, Mirsade Džindo i Srete Crnjaka, kao članova vijeća, odlučujući o žalbi Senadin Bajrića, Katzbachstrasse 39, 10965 Berlin, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 29.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine.

Žalitelj je protiv navedene odluke blagovremeno izjavio žalbu navodeći da se uredno prijavio za glasanje na Lokalnim izborima 2020. godine, ali da je provjerom utvrdio da se ne nalazi na spisku glasača iz Općine Prijedor, gdje je i prijavljen za glasanje. Moli za objašnjenje zašto se ne nalazi na spisku, te u prilogu žalbe ponovo šalje dokumentaciju za prijavu za glasanje.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana iz razloga što žalitelj nije upisan u Centralni birački spisak, niti je dostavio valjan

dokaz o prebivalištu (lična karta BiH ili potvrda o prebivalištu u BiH) da bi mogao biti upisan.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz predmeta spisa utvrđeno je da je žalitelj dana 26.08.2020. godine elektronskim putem podnio prijavu za glasanje izvan BiH u kojoj je naveo da se glasački materijal na njegovo ime dostavi na adresu u Berlinu, Katzbachstrasse 39, te je u prilogu dostavio fotokopiju pasoša BiH izdatog u diplomatsko-konzularnom predstavništvu BiH u Berlinu.

Odredbom člana 3.15 stav (1) Izbornog zakona BiH („Službeni glasnik BiH“, broj 23/01 do 31/16), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Nadalje, odredbom člana 1.4 Izbornog zakona BiH propisano je da državljanin BiH sa navršenih 18 godina života ima pravo da glasa i da bude biran, ali da bi ostvario svoje biračno pravo mora biti upisan u Centralni birački spisak, u skladu sa Izbornim zakonom BiH.

Iako je žalitelj državljanin Bosne i Hercegovine, pošto nije dokazao da ima prijavljeno prebivalište na teritoriji BiH, a što se dokazuje ličnom kartom BiH ili potvrdom o prebivalištu u BiH koje žalitelj nije dostavio, imenovani osnovano nije upisan u Centralni birački spisak od strane nadležnog organa, kako to propisuje odredba člana 3.13 u vezi sa članom 3.5 Izbornog zakona BiH, pa time nije ni ispunio osnovni uslov za ostvarivanje prava za glasanje van BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A

Zvezdana Antonović